

摺奏叙官類

內閣奏遵議直督奏劉書雲等治獄助賑請獎摺

奏爲遵 旨議奏事准吏部移交直隸總督陳夔龍奏保典獄官劉書雲等治獄助賑請獎一片於宣統二

年十二月二十八日奉 硃批吏部議奏片併發欽此欽遵移交前來查原奏內稱准部咨陝日督臣長庚

奏直隸保定習藝所罪犯以花紅銀兩捐助甘賑請獎典獄官一片欽奉 硃批著直隸總督酌核給獎欽

此伏查陝甘督臣以該所各犯專心工藝由典獄官董率有方積此餘利既經奏准酌核給獎自應欽遵辦理

天津習藝所典獄官北河試用通判朱元炯任事年餘著有成效經前督臣袁世凱保准以知州仍留直隸補

用於光緒三十二年三月初二日欽奉 硃批著照所請吏部知道欽此欽遵在案今該員等治獄將及

五載資勞俱深其感動罪囚協助賑款尤爲人所難能合無仰懇 天恩俯准將捐升離任清苑縣典史捐

分直隸補用縣丞劉書雲北河試用縣丞鄭思章均免補本班以知縣仍留直隸補用以昭激勸等因查捐升

直隸試用縣丞劉書雲北河試用縣丞鄭思章二員前經直隸總督陳夔龍以整頓監獄著有成效奏請獎叙

奉 旨交議經前吏部議駁在案茲據該督奏稱前因此件既經欽奉 硃批准其給獎自應欽遵辦理

查吏部則例內開勸捐董事出力人員如奉 旨從優議叙者紳士給予紀錄三次地方官亦給予紀錄三

次未經奉 旨從優議叙者給予紀錄二次等語此案劉書雲鄭思章二員應按地方官勸捐出力未經奉

旨從優議叙叙例辦理各給予紀錄二次註冊至原保均請免補本班以知縣仍留直隸補用仍請毋庸置

議再原奏內稱典獄官北河試用通判朱元炯保准以直隸州補用查此件係奉 特旨允准不得援以

爲例合併聲明所有遵議緣由謹繕摺具陳伏乞 皇上聖鑒謹 奏宣統三年七月二十七日奉 旨

依議欽此

兩廣總督張鳴岐奏在逃已革知縣陳景華請開復原官摺 恩開復原官以收後效恭摺仰祈 聖鑒事臣聞馬

或奔蹏而致千里士或有負俗之累而立功名守法則但取中材濟變則動需奇傑是以舉裴豹於丹書則晉人用霸棄張元於塞外則韓范無功非宏解網之仁必有失才之憾竊查在逃已革廣西候補知縣陳景華前在署貴縣任內因戕殺撫匪陸乾一案經前任兩廣督臣岑春煊執法嚴叅並先交看管恭候 朝命該員自知罪在不測逃死海外迄未獲案臣撫廣西時距該員得罪未久廣西之人語及陳景華僉謂其果於殺戮誠屬駭人聽聞惟當盜賊披猖之時反不可少此武健嚴酷之吏雖其草薶禽獮未免玉石不分然至事過境遷衡量功罪則凡該員所蒞如馬平縣容縣貴縣等處率皆盜賊絕跡幾有夜不閉戶之風是則就原案論陳景華罪有應得功亦相當幸逢 聖朝蕩滌瑕穢之時似尙在情有可原之例而令其懷奇負異長抱英雄失路之悲甚非所以惜人才而宏遠慮也伏惟 國家曠蕩之 恩屢頒肆赦從前獲咎在逃各員如王照裴景福等均蒙 寬貸或旋被 擢用况陳景華以勇於除匪致蹈刑章其罪可矜其才尤可惜合無仰懇 天恩准將在逃已革知縣陳景華開復原官交臣差遣委用不但該員蒙 異量之恩宜有捐糜之報即臣亦得藉收臂助共濟時艱所有請將在逃已革廣西候補知縣開復原官緣由謹恭摺具陳伏乞 皇上聖鑒謹 奏宣統三年八月十一日奉 硃批陳景華著准其交張鳴岐差遣委用隨時查看俟有勞績再行請旨欽此

學部奏派侍讀梁慶桂在本部參議上行走片

再內閣候補侍讀梁慶桂前經臣部奏派前往美洲考察華僑學務該員到美以後聯絡商董勸導僑民設立小學聞風興起頗著成效實不無微勞足錄臣部綜攬學務亟須得人爲理該員學識明通實心辦事擬派在臣部參議上行走以資任使謹附片具陳伏乞 聖鑒謹 奏宣統三年七月二十九日奉 旨依議欽此